

SPOMENICA
SOKOLSKOG DRUŠTVA
LUKAVAC

PRILIKOM PROSLAVE DESETGODIŠNJICE



SARAJEVO 1934 - »NOVA TISKARA« VRČEK I DR.

SPOMENICA
SOKOLSKOG DRUŠTVA
LUKAVAC

PRILIKOM PROSLAVE DESETGODIŠNJICE

22 DO 24 JUNA

1934

SARAJEVO 1934 - »NOVA TISKARA« VRČEK I DR.

PREDGOVOR

Ove godine navršava se 10 godina rada Sokolskog društva u Lukavcu.

Kolikogod bili skromni rezultati ovoga rada, vredno ih je zabilježiti, koliko radi savremenika i aktivnih saradnika, toliko radi budućih naraštaja, kojima treba sačuvati podatke o prvim danima sokolskog pokreta u Lukavcu.

To evo želimo postići ovom Spomenicom, koju izdajemo povodom današnje proslave, a u kojoj u kratko iznosimo istorijat ovih 10 sokolskih godina.

LUKAVAC, u junu 1934

1918 - 1924

Odmah po Oslobođenju 1918 g. sve predratne, tada još plemenske, sokolske jedinice obnovile su rad i počele raditi na osnivanju novih sokolskih društava i širenju sokolske misli u mjestima, gdje do tada nije bilo pristalica sokolstva.

Da bi se stanovnici Lukavca upoznali i zadobili za sokolstvo, priredilo je Sokolsko društvo iz Tuzle u ljetu 1919 svoj Javni čas u Lukavcu. To je bila prva sokolska manifestacija u Lukavcu, a održana je u parku iza tvorničke kasine nedaleko od našeg današnjeg ljetnog vježbališta.

I pokraj svih napora sokolstva nagli razvoj sporta doveo je do toga, da se u Lukavcu mnogo prije i to u godini 1920 osnovao sportski klub »Solvay«, koji je u početku gojio samo nogometni sport. Tek kasnije, a na inicijativu bivšeg direktora pok. Josipa Walende i još nekih drugih, koji su se još prije rata bavili gimnastikom, osnovana je u sportskom klubu lako-atletska sekcija u kojoj se je vježbalo pretežno na spravama i tako se ta sekcija pretvorila zapravo u gimnastičku sekciju. Ovu sekciju vodio je kao prvi pročelnik brat Otokar Strmiska, kasnije prvi načelnik našega društva po narodnosti Čeh i odgojeni soko. Vježbalo se u tadašnjem dječijem zabavištu.

Među prvim poslije rata osnovano je već 1919 Sokolsko društvo u Kreci, koje je ubrzo postalo jedno od najaktivnijih društava župe Tuzla.

Već 1924 g. osvetilo je Sokolsko društvo u Kreci svoju društvenu zastavu, kojom prilikom je priređen

Javni čas, kome su prisustvovali i članovi ove gimnastičke sekcije i kojom prilikom je sa funkcionerima tuzlanskog i krečanskog sokola već raspravljano o mogućnosti osnivanja Sokolskog društva u Lukavcu.

Neposredno iza toga došlo je u tome cilju i do sastanka u Lukavcu, kome su prisustvovali članovi župe i to: starješina brat Staja T. Stajić, zamjenik starješine brat Branko Stakić, načelnik brat Kovaljski i zamjenik načelnika brat Stevan Jakšić, a od Lukavčana direktor Walenda, brat Stanko Tartaglia i brat Otokar Strmiska.

Na ovom sastanku došlo se je do uvjerenja, da su prilike za osnivanje Sokolskog društva u Lukavcu povoljne, i da ima izgleda, da će društvo napredovati.

Sazvana je osnivačka skupština, koja je održana 22 juna 1924 u sali radničkoga doma, koja je sve do 1930 g. kada smo se preselili u novi dom služila kao sokolana. Sastanak je otvorio zamjenik starješine župe Petra Velikog Oslobodioca u Tuzli brat Branko Stakić, koji je u kratkom govoru iznio cilj sokolstva i potrebu, da se u Lukavcu osnuje Sokolsko društvo. Skupština je to prihvatila i pristupilo se je odmah upisu članstva. Upisalo se je 53 člana i izabrana je prva društvena uprava:

Starješina Stanko Tartaglia, zamjenik starješine Ivo Mervar, tajnik Stjepan Kovačević, načelnik Otokar Strmiska, blagajnik Ing. Aleksandar Ilić, matičar Đuro Babić, revizori Ivan Pešta i Josip Hiersche.

Do kraja godine upisalo se je još 19 članova tako, da je broj članstva iznosio 72 i 20 članova utemeljača a to su:

Sadašnji direktor tvornice Ing. Mirko Müller, Lukavac; Stanko Tartaglia, Lukavac; Dr. Edhem Spaho, Sarajevo; Galovec Josip, Zagreb; Zweythurm Karl, Lukavac; Furcht Ludwig, Sarajevo; Karger Leopold, Tuzla; Čeliković Emil, Osijek; Licht Adolf, Zagreb; Strauss Florijan, Tuzla; Braća Ponjavić, Tuzla; Bagi Wilhelm, Sa-

rajevo; Wolf Julijo, Sarajevo; Goldberger Alfred, Bos. Brod; Dr. Viktor Jankijević, Tuzla; Trafikant Gabor, Su- botica; Ujedinjene centralne banke, Tuzla; Sjedinjene tvornice stakla d. d., Zagreb; Bosanska industrijalna i trgovačka banka Tuzla; Zemaljska banka za Bosnu i Her- cegovinu, Tuzla.

Za zasluge oko osnivanja društva i potporu, koju je Uprava tvornice već od samog početka ukazivala našem društvu, direktor Josip Walenda izabran je za počasnog starješinu društva.

Članova vježbača bilo je odmah 26 i to 21 član i 5 članica. Navodimo imena ovih prvih članova vježbača:

Braća: Otokar Strmiska, Osman Tufekčić, Kiril Piš- nov, August Marošević, Petar Mott, Ljudevit Kantor, Jovo Despotović, Ladislav Pejić, Vlado Kokotović, Franjo Klausner, Ivan Likić, Mato Djaković, Petar Sehne, Anton Meršnik, Nazif Rokolj, Josip Hornung, Rajmund Gold- bacher, Ivan Inn, Stjepan Matišević, Stanislav Nussbaum i Tanasije Radić; sestre: Ana Kantler, Mica Peša, Elza Becker, Kristina Cimerman i Reza Köhl.

Muškog naraštaja bilo je 8, muške djece 15, a ženske 14, dakle veoma lijep broj, koji se je dnevno povećavao.

Kategoriju članova i muške dječice vodio je brat Oto- kar Strmiska. Članice je vodio brat Peša, muški naraštaj brat Tufekčić, žensku djecu brat Hornung, a kasnije se- stra Peša.

Već u mjesecu julu počele su vježbati sve kategorije, a vježbalo se je u radničkom domu u sali i vježbalištu kraj doma.

Na Vidov-dan 28 juna održan je Pokrajinski slet u Sarajevu, kojeg je posjetilo nekoliko članova i članica.

U mjesecu oktobru održan je prvi Javni čas, na ko- jemu su istupile sve kategorije sa prostim vježbama i skupinom na četverodelnim ljestvama.

Akademija na 1 decembra nije se mogla održati nego je održana u mjesecu januaru.

Stručna knjižnica, koja je osnovana već u prvoj godini brojala je koncem godine 16 knjiga.

Prve sprave, koje smo imali na raspolaganju, a koje smo dobili od uprave tvorničke osnovne škole, bile su: vratilo, ruče, kozlić, otkočna daska, strunjača, nekoliko bučica, ćunjeva i t. d.

II godina 1925

Glavna je godišnja skupština održana 31 januara na kojoj je izabrana stara uprava, jedino je za načelnika umjesto brata Strmiske izabran brat Norbert šerko.

Društveni prosvjetar nije biran, a prosvjetni rad naizmjenice vršili su brat Ing. Ilić i brat Dr. Ljudevit Jurinac. 1925 godine osnovana je Sokolska čitaonica, koja je bila smještena u tvorničkoj kasini u prostorijama gdje je do tada bila čitaonica namještenika tvornice. Društvena biblioteka povećana je velikim brojem zabavnih knjiga.

Još pred kraj prošle godine opaža se nazadovanje volje za rad i nazadovanje broja članstva, tako da je u početku godine vježbalo samo 9 članova, a taj broj ostao je i kroz cijelu godinu. Radi neredovitog pohađanja vježbi i pomanjkanja discipline raspušten je muški naraštaj. Uzrok ovom nepovoljnom stanju bile su neke lične razmirice, nedovoljna svijest, pomanjkanje discipline i konačno protuakcija stanovitih elemenata, kojima nije bio po volji napredak u sokolskom društvu. Koncem godine društvo je brojalo 85 članova.

Na 9 maja održan je javni čas sa svim kategorijama. Organizovano je pet izleta pješice od ukupno 74 km.

Na župskom sletu u Tuzli sudjelovalo je 10 članova, 9 članica, 12 muške i 9 ženske djece, a na međusletskim utakmicama u Beogradu nastupilo je u župskoj vrsti 1 brat kao takmičar, 1 kao sudac, a 3 sestre kao posmatrači.





Figura skola na vrhu Galešnika za vrijeme ljetovanja



Otočić Galešnik na ulazu u luku Hvar

U ovoj godini organizovano je I ljetovanje na moru i to na otočiću Galešniku pred Hvarom od 13 jula do 15 augusta. Ljetovalo je 57 pripadnika i tom prilikom na Hvaru pred čitaonicom održan je javni čas i iluminacija Galešnika.

Ovo ljetovanje bilo je moguće jedno od prvih, u većem stilu priređenih sokolskih ljetovanja.

Na vrhu do tada pustog otočića Galešnika blistala je na žarkom južnom suncu srebrna figura sokola raširenih krila u nadnaravnoj veličini, koju je izradio brat Mihajlo Lisovski. Ovaj impozantni i nadaleko vidljivi lik često su pozdravljali prolazeći brodovi.

Za vrijeme ljetovnja posjetio nas je brat Vincenc Stěpanek, sadašnji tajnik Saveza slovenskog sokolstva iz Praga i izrazio se je veoma laskavo o organizaciji ljetovanja.

Na malom pristaništu Galešnika jedna cementna ploča trajno će posjetiocima kazivati, da je ovdje ljevalo Sokolsko društvo iz Lukavca.

Prvodecembarska akademija održana je 12 decembra.

III godina 1926

Ovo je godina svesokolskog sleta u Pragu, za koju smo se počeli odmah spremati. Glavna skupština, koja je održana 31 januara znatno je izmjenila upravu društva i to za zamjenika starješine birani su Ilija Popović i Ivo Mervar, za tajnika Osmanović Husejin, za načelnika Tufekčić Osman, a za prosvjetara Šerbić Sadija.

Prvi puta biran je prosvjetar i to mladi intelektualac Sadija Šerbić, koji je sa mnogo volje počeo da radi u prosvjetnom pravcu. Za vrijeme svoga kratkog boravka u Lukavcu održao je u sokolani nekoliko predavanja. Kasnije kao profesor u Sarajevu nesretno je završio svoj mladi život. Neka nam ostane u trajnoj uspomeni.

Na svesokolskom sletu u Pragu prisustvovali smo sa 5 članova vježbača i 2 članice.

Prvi puta održane su župske lako-atletske utakmice za prelazni dar, župsku zastavu, koju je poklonilo Njegovu Veličanstvo Kralj. Za ove utakmice postavili smo svoju vrstu.

Na župskom sletu u Tesliću učestvovali smo sa 15 članova, 8 članica, 8 muške i 8 ženske djece.

Radi malog broja vježbača nije održan naš javni čas. Organizovano je 10 izleta i pješice prešlo se je oko 117 km.

U ovoj godini organizovano je II ljetovanje i to samo sa djecom u Olovu, za vrijeme kojeg je napravljen izlet u okolicu i to Ozren i Han-Pijesak. Na 15 augusta priređena je u Olovu akademija na kojoj su nastupila djeca.

Prvodecembarska akademija održana je 19 decembra sa 7 gimnastičkih tačaka.

Društvo je poslalo brata Dragu Radeljkovića na savezni prednjački tečaj, koji je kasnije, pošto je ponovno sastavljena kategorija muškog naraštaja, vodio tu kategoriju.

IV godina 1927

Glavna skupština održana je 30 januara. Radi odlaska brata Šerbića izabran je za prosvjetara brat Bilčar Stevo. Inače je ostala nepromijenjena stara uprava.

Na 17 jula priredili smo u Lukavcu prvi okružni javni nastup i takmičenje, koje je neobično uspjelo u pogledu vježbe i posjete. Na župsko takmičenje poslali smo samo vrstu muškoga naraštaja, koja je postigla II mjesto.

Akademija je održana tek u januaru 1928. Ljetovanje se nije moglo izvesti samostalno već smo 20 djece poslali na ljetovanje sa društvom Kreka pod Ozren.

I ove godine se je nastojalo, da se spremi što više prednjaka, pa su pohađali savezni prednjački tečaj brat Tufekčić i Avdibegović 14-dnevni župski tečaj. Brat Avdibegović preuzeo je nakon toga vrstu muške djece, koju je vodio sve do 1930 g.

Pred kraj ove godine došlo je ponovno do trzavica u društvu radi kojih je dotadašnji zaslužni starješina društva brat Stanko Tartaglia podnio ostavku. Ostavku je podnijela docnije i cijela društvena uprava, pa je na vanrednoj skupštini od 18 septembra birana nova uprava koju su sačinjavali:

Starješina brat Ivo Mervar, zamjenik starješine Ing. Ilić Aleksandar, načelnik Radeljković Dragan, tajnik Osmanović Husejin. Funkciju prosvjetara preuzeo je provizorno Ing. Aleksandar Ilić.

V godina 1928

Na godišnjoj skupštini, koja je održana 29 januara izmjenjena je uprava u toliko što je za zamjenika starješine izabran Polanski Vaclav, za načelnika ponovno Tufekčić Osman, koji je ujedno bio oruđar, za prosvjetara Papić Stjepan, za tajnika Radeljković Dragan.

Tehnički rad u ovoj godini bio je vrlo intenzivan. U drugoj polovini godine osnovana je prvi puta vrsta ženskoga naraštaja. Pohađanje vježbi bilo je mnogo redovitije.

3 maja održan je naraštajski slet sa takmičenjem naraštaja u Brčkom, kojom prilikom je razvijena župska naraštajska zastava, poklon đeneralata brata Stajića. Na ovom takmičenju učestvovali smo sa vrstom muškog naraštaja.

Na okružnom javnom nastupu u Kreci 10 maja istupilo je naših 8 članova, 10 članica, 11 muškog naraštaja i 10 muške djece.

Na župskom sletu u Skoplju prisustvovalo je naših 8 članova i 7 članica. Učinjen je izlet na Kosovo. Naša župa posjetila je Južnu Srbiju i to naročito društvo Strumicu, gdje je priređen javni čas i akademija. Prisustvovala su naša 2 člana i 3 članice i to kao vježbači na javnom času, a 2 članice i na akademiji.

19 augusta održano je župsko takmičenje u Doboju, na kojemu je naša vrsta članica postigla III mjesto, a sestra Berta Šmidek II mjesto kao pojedinac. Od članova takmičili su se 4 i to kao pojedinci.

1 decembra priređena je vrlo uspjela akademija sa 7 tačaka.

Inače je i ova godina bila puna trzavica od čega je trpio rad u društvu.

VI godina 1929

Prilike u društvu počele su se sređivati, ali je rad još uvijek bio slab. Na godišnjoj skupštini održanoj 26 januara za zamjenika starješine biran je brat Peša Ivan, za tajnika brat Đuro Babić, za blagajnika Karlo Krsek.

Na župskom takmičenju istupili smo sa vrstom članova, članica, muškog i ženskog naraštaja i postigli smo prilično dobre rezultate. Isto tako smo sudjelovali i župskom sletu sa 4 člana, 4 članice, 14 muškog i 5 ženskog naraštaja.

Na pokrajinski slet Poljskog sokolstva u Poznanju izaslali smo dva člana, koji su tom prilikom i istupili na pokrajinskom sletu čehoslovačkog sokolstva u Plznu.

Te godine priređeno je III ljetovanje na Korčuli.

Akademija je održana na 30 novembra sa 7 tačaka.

VII godina 1930

Krajem 1929 godine raspušteni su plemenski sokolski savezi i na osnovu zakona osnovan novi Savez sokola Kraljevine Jugoslavije, kojemu pristupa zaključkom skupštine od 15 decembra Jugosl. Sokolski Savez sa svim svojim jedinicama.

Nakon likvidacije našega društva u smislu uputa župe Tuzla, održana je 14 februara glavna skupština, koja je izabrala slijedeću novu upravu:

Starješina: Mervar Ivo, zamjenik starješine i prosvjetar Ing. Janković Bogoljub, načelnik Tufekčić Osman, tajnik Milišić Miloš, blagajnik i matičar Krsek Karlo, oruđar i domaćin Ostrolučanin Luka, knjižničar Matišević Stjepan, članovi uprave: Dr. Jurinac Ljudevit, Avdibegović Hazim, šešlija Bogoljub, Polanski Vaclav, zamjenici

članova uprave: Despotović Jovo, Ostrolučanin Luka, revizori: Matišević Stjepan i Tešić Boško, zamjenici revizora: Čehajić Safet i Zimmermann Kristina.

Ova je godina od velikog značaja za naše društvo.

Na Vidov-dan održan je u Beogradu svesokolski slet na kome smo učestvovali u velikom broju, a isto tako i na župskom sletu održanom u Tuzli. Ovom prilikom istupila je i vrsta starije braće.

Na 12 oktobra otvoren je naš novi sokolski dom u zgradi koju je Sokolskom društvu stavila na raspolaganje Uprava tvornice, a koja je do tada služila za vjerske obrede. Osim sale za vježbanje postoje nuzprostorije i to 1 soba za sjednice i 1 soba za čitaonicu u kojoj je instaliran radio-aparat. Posjetiocima stoji na raspolaganju veliki broj časopisa i novina.

Otvorenje doma izvršeno je na svečani način, kojom prilikom je održan javni čas uz sudjelovanje bratskih društava Tuzla, Kreka i Bukinje i četa Husine i Bistarac.

Istupili smo sa 10 članova, 8 starije braće, 11 muške i 17 ženske djece.

Novi sokolski dom mnogo je doprineo napredovanju društva, jer nam je omogućio, da u svim pravcima proširimo svoj rad.

Vrlo uspjela prvodecembarska akademija održana je 30 novembra.

Prosvjetni odbor po prvi puta konstituisao se je u predviđenom broju i počeo intenzivno raditi priređujući društvene večeri i predavanja. Osnovan je pozorišni osek i muzička sekcija.

Na župski prednjački tečaj poslan je brat Dimitrije Mičić.

VIII godina 1931

Društvena uprava birana na godišnjoj skupštini od 11 januara izmjenjena je u toliko što je za tajnika biran brat Radeljković Dragan.

Ove godine bilo je više unutarnjega rada, jer nije bilo ni župskih ni društvenih priredbi, nego jedino župska takmičenja u Tuzli.

Na župskim takmičenjima u Tuzli istupila su 3 člana kao pojedinci. Brat Milišić Miloš postigao je III mjesto u župi i nagrađen je velikom diplomom, a brat Pečl malom. Vrsta ženskog naraštaja također je postigla III mjesto i nagrađena malom diplomom, a sestra Smech Ana nagrađena je malom diplomom za postignuto III mjesto kao pojedinac. Osim toga dobile su malu diplomu sestre Ema Pečl i Mica Mandić.

U ovoj godini počela se je igrati odbojka.

U mjesecu augustu bio je u Lukavcu prednjački tečaj za učitelje i IV župski prednjački tečaj za članove društva. Od naših pohađali su tečaj 2 brata i 1 sestra. Iza takmičenja održan je javni čas na kome su istupili od našega društva 10 članova, 5 muškog i 12 ženskog naraštaja i 26 članova čete. Brat Dimitrije Mičić položio je pomoćnički ispit.

U mjesecu julu osnovali smo četvu u Bistarcu, koju je vodio brat Dramušić kao načelnik. Ljeti se je vježbalo u školskom dvorištu u Bistarcu, a zimi 1 puta nedeljno u sokolani u Lukavcu. Rad je bio napredan.

Od polovine jula do polovine augusta održano je IV ljetovanje u Bakru, na kome je sudjelovalo 40 članova svih kategorija.

Prvodecembarska akademija održana je 5 decembra na kojoj je nastupilo 69 članova svih kategorija.

IX godina 1932

Godišnja skupština održana je 10 januara. Izabrana je stara uprava, a za prosvjetara biran je brat Aleksandar Janković.

Ova je godina bila vrlo obilna priredbama.

Na 30 aprila održana je akademija u pomen pogibije hrvatskih mučenika Zrinjskog i Frankopana sa 4 gimnastičke tačke.

Na 30 aprila održao se je u Lukavcu okružni javni nastup na kome je nastupilo 98 članova društva svih kategorija, a od čete Bistarac 12 članova i 24 muške djece. Na ovom javnom času prvi puta se je javno nastupilo sa odbojkom.

Na 3 septembra održane su okružne utakmice u odbojci, kojom prilikom je pobjedila naša vrsta članova i ženskog naraštaja, a vrsta članica i muškog naraštaja postigla je II mjesto. Isti dan održane su utakmice između pobjednika u pojedinim okruzima. I okrug zastupalo je naše društvo, II okrug društvo Bos. Brod i IV okrug društvo Zvornik i to samo sa vrstama članova. I ovom prilikom je naše društvo pobjedilo i time postalo prvak župe u odbojci. Pošto drugi okruzi nisu postavili i vrste ostalih kategorija to su pobjednici u I okrugu ostali i pobjednici u župi.

Na 4 septembra održano je župsko lako-atletsko takmičenje i takmičenje u plivanju na 50 metara slobodnim stilom isto u Lukavcu. U lako-atletskom takmičenju bilo je svega 33 člana, na koje je takmičenje naše društvo dalo 8 takmičara, a koji su se plasirali na 8, 10, 14, 16, 17, 19, 21 i 23 mjesto. Na takmičenju u plivanju takmičila su se naša dva člana i brat Avdibegović je postigao I mjesto, a brat Polanski Hugo II zajedno sa bratom Stuhlijem iz Kreke. Brat Avdibegović je preplivao prugu od 50 metara za 37" i $\frac{9}{10}$.

Sudjelovali smo na javnom času u Kreki sa 8 članova, 12 muškog i 8 ženskog naraštaja.

Na svesokolskom sletu u Pragu sudjelovali smo sa 8 članova vježbača iz društva i 2 člana čete iz Bistarca.

14 augusta sudjelovali smo na proslavi dvadesetpet-godišnjice i razvijanju društvene zastave u Derventi sa 3 člana i 10 naraštajki, koje su istupile na javnom času.

Isti dan održan je izlet društva u Jovanovac (Jenji dunja), na kome je bilo 55 članova svih kategorija, a pre-valjeno je 20 kilometara.

Na 11 septembra održano je pokrajinsko takmičenje u odbojci između župa: Tuzla, Sarajevo, Cetinje, Mostar i Užice u Sarajevu. Na ovo takmičenje išla je vrsta članova i ženskog naraštaja našeg društva i vrsta muškog naraštaja iz Tuzle. Na ovom takmičenju postavile su vrste članova samo župa Sarajevu, Tuzla i Užice, a muški i ženski naraštaj samo naša i sarajevska župa. I ovdje su naše vrste pobjedile, a muški naraštaj je izgubio.

Na 25 istog mjeseca održane su savezne utakmice u odbojci u Beogradu, pa je naša vrsta članova kao pobjednik u Sarajevu išla i u Beograd na takmičenje i u prvom kolu izgubila igru sa vrstom kragujevačke župe. Time je ispala iz daljnjeg takmičenja. Korist je bila svakako za našu vrstu, jer su igrači vidjeli tehniku igre, a naročito u župi Maribor, koja je bila pobjednik na tom takmičenju.

Na 28 augusta članovi čete Bistarac sudjelovali su na okružnom takmičenju i javnom nastupu četa I okruga pod Ozrenom. Na takmičenju postigla je osmo mjesto.

Prilikom otvorenja Sokolskog doma u Tuzli naš muški naraštaj nastupio je na akademiji sa tačkom »tri petice«.

Na 3 decembra priređena je akademija na kojoj je u 8 tačaka istupilo 60 vježbača.

U ovoj godini osnovan je prednjački zbor i održavao je svoje časove jedanput nedeljno. Tehnički rad bio je do-

bro raspoređen, jer je svaka kategorija imala svoga vođu. Sestra Smech Ana položila je pomoćnički ispit i preuzela vodstvo ženske djece. Prelazom nekoliko naraštajki u članice počela je vježbati vrsta članica. U martu počeo je vježbati muški naraštaj, koji je raspušten u novembru prošle godine.

U toku godine od sprava nabavljene su mehaničke ljestve, 2 motke za skok u visinu, stalci za skok u visinu s motkom i bučica od 50 kg.

X godina 1933

U godini 1933 birala je glavna godišnja skupština od 15 januara ponovno staru upravu sa izmjenom što je za prosvjetara biran brat Radeljković Dragan, a za tajnika sadašnji tajnik društva brat Stanko Drolc.

Već od godine 1930 osjeća se stalno napredak u tehničkom i prosvjetnom pogledu. Parastao je znatno i broj članstva. Dok je u god. 1926—1930 broj članova iznosio oko 70 u godini 1931 povisio se je na 75, u god. 1932 na 93, a koncem godine 1933 iznosio je 106 članova.

Po rasporedu načelnništva župe održan je u Lukavcu u januaru društveni prednjački tečaj, kojeg je pohađalo 7 braće i 5 sestara, a završilo je 2 brata i 3 sestre. Župski prednjački tečaj pohađali su naša 2 brata i 1 sestra.

U aprilu održani su pomoćnički ispiti I okruga u Lukavcu, na kome su od našega društva položili ispit 4 brata i 1 sestra.

U Lukavcu priređen je u julu 10 dnevni prednjački tečaj I okruga, koji je od naših pohađalo 2 brata i 1 sestra.

Na 28 maja održan je okružni javni nastup u Lukavcu. Istupilo je naših 15 članova, 8 članica, 12 muškog i 7 ženskog naraštaja, 37 muške i 28 ženske djece i 20 muške djece čete Bistarac ukupno 127 vježbača. Nastup je potpuno uspio i ako je padala jaka kiša, koje se još svi dobro sjećamo.

Na župskom takmičenju postavili smo vrstu ženskog naraštaja, a članovi i članice takmičili su se kao pojedinci. Vrsta ženskog naraštaja postigla je II mjesto, a kao pojedinci sestre Bajštingel II i Polanski III mjesto. U srednjem odjelenju postigla je sestra Smech Ana II, a sestra Ema Pečl III mjesto. Braća Wayand Anton i Scharf Ivan postigli su u nižem odjelenju preko 85% bodova i dobili su veliku diplomu i time došli u župsku vrstu za međusletske utakmice u Ljubljani, gdje su dobili malu diplomu.

Učestvovali smo aktivno na župskom sletu u Tuzli i na Ljubljanskom sletu sa naraštajem i članstvom.


Na 27 augusta održane su okružne utakmice u odbojki između društava I okruga na kojima su naši članovi postigli I, a članice II mjesto. U odbojki takmičili smo se u Zvorniku sa IV a u Doboju sa II okrugom, gdje su naše vrste pobijedile.

Na javnim časovima u Bukinju i Gračanici sudjelovali smo aktivno u velikom broju.

U sokolskoj četi Bistarac rad je skoro potpuno prestao. Sazivali smo sastanke da bi obnovili rad, ali to nije imalo uspjeha pa smo bili konačno prinuždeni, da sokolsku četu Bistarac, nadamo se samo privremeno, raspustimo i likvidiramo.

Prosvjetni rad, koji je ove godine vodio brat Drago Radeljković bio je dobro organizovan i uspješan tako, da je društvo u pogledu prosvjetnog rada došlo na prvo mjesto u župi.

Zavedeno je održavanje idejnih škola za novo članstvo, održavanje roditeljskih sastanaka, osnovana je štednja po štednim knjižicama, osnovan je socijalni fond za pomaganje siromašnih i nezaposlenih članova, priređeno je nekoliko debatnih večeri, osnovan je muški pjevački zbor i pojačan rad tamburaškog zbora i pozorišnog odsjeka. 10-dnevni savezni prosvjetni tečaj u Novom Sadu pohađao je sadašnji prosvjetar brat Miloš Milišić.



Uprava Sokolskog društva Lučavac god. 1933

1934

Današnja uprava izabrana je na glavnoj skupštini od 4 februara sastoji se iz slijedećih lica:


Starješina Mervar Ivo, zamjenik štarješine Ing. Janković Bogoljub, tajnik Drolc Stanko, načelnik Tufekčić Osman, zamjenik načelnika Mičić Dimitrije, načelnica Smech Ana, zamjenica načelnice Pečl Ema, predsjednik P. O. Milišić Miloš, blagajnik Krsek Karlo, članovi uprave: Dr. Jurinac Ljudevit, Ing. Rant Zoran, Ing. Ilić Aleksandar, Janković Aleksandar, Matišević Stjepan, Čehajić Safet, Kovačević Marko, Somov Evgenije, Tolpa Radovan, Hnilička Mařenka, zamjenici članova uprave: Vukova Jelena, Hojer Irma, Krulj Radoslav, Avdibegović Hasim, Wayand Anton, revizori: Eleckoj Leonid, Papić Stjepan, Oštrolučanin Luka, zamjenici revizora: Vavrikov Đuro, Višnjic Simo.

Već u početku godine započele su pripreme za ovogodišnje sokolske sletove u Sarajevu i Zagrebu. U toku su pripreme za ovogodišnje V ljetovanje, koje će se održati u mjesecu julu u Trogiru.

Povodom desetgodišnjice osnivanja društva, koje pada na 22 juna o. g. zaključeno je, da se priredi proslava i razvije društvena zastava. Izabran je u tu svrhu naročiti odbor radi organizacije ove proslave.

Društvena zastava nabavljena je iz dobrovoljnih priloga od kojih nam je dužnost naročito istaknuti prilog uprave Jugoslavenske Solvay Tvornice u iznosu od Din. 6.000.—.

Za ovu veliku potporu izražavamo našu duboku zahvalnost upravi Jugoslavenske Solvay Tvornice i njenom direktoru gosp. Ing. Mirku Mülleru, koji nas je kroz svih ovih 10 godina najizdašnije pomagao.



Pripadnici Sokolskog društva Lukavac god. 1933

Naročitu zahvalnost dužni smo da iskažemo generalnom direktoru Jugoslavenske Solvay Tvornice gospodinu Eudore Lefèvre-u, koji se je primio da kumuje zastavi.

Neka je naša iskrena i bratska zahvalnost i svim ostalim darovateljima, čija će imena u knjizi prilagača i na koplju naše zastave biti trajno sačuvana.

RASPORED SVEČANOSTI:

PETAK 22 JUNA
TAKMIČENJE U ODBOJCI

u 14.30 časova na vježbalištu sokolskog doma između društava I okruga.

POŽORIŠNO VEČE

u 20.30 časova u sali tvorničke kasine sa nastupom društvenog pjevačkog zbora.

1. »*Jugoslavija*« od S. Paščana Kojanova — pjeva muški društveni pjevački zbor.
2. »*Zla žena*« od Jovana Sterije Popovića — izvodi društvena pozorišna sekcija.

SUBOTA 23 JUNA

TAKMIČENJE DRUŠTAVA PRVOG OKRUGA

u 6 časova na vježbalištu sokolskog doma prema raspodeli načelnništva župe.
u 20 časova

BAKLJADA I POZDRAV KUMU ZASTAVE

AKADEMIJA

u 20.30 časova u sali tvorničke kasine sa slijedećim programom:

1. »*Slikovite vježbe petorice*« od Mudri-a — muška djeca
2. »*Brodari*« od M. Jankovića — ženska djeca
3. »*Marš iz opere Prophet*« — muški naraštaj
4. »*Jugoslavenski vojnik*« od Bogunovića — muška i ženska djeca
5. »*Veče na Savi*« od Schwarzwald-a — ženski naraštaj
6. »*Zečji repić*« od Burgerove Dubove — ženska djeca mlađa

Poslije programa igranka na kojoj svira društvena glazbena sekcija.

NEDELJA 24 JUNA U 16 ČASOVA

RAŽVIJANJE ŽASTAVE

kojoj kumuje generalni direktor Jugosl. Solvay Tvornice
gosp. Eudore Lefèvre.

JAVNA VJEŽBA

sa slijedećim programom :

1. Članovi — proste vježbe za slet u Sarajevu
2. Članice — proste vježbe za slet u Sarajevu
3. Muški naraštaj — proste vježbe za slet u Sarajevu
4. Članovi četa — proste vježbe za slet u Sarajevu
5. Muška i ženska djeca — proste vježbe za slet u Sarajevu
6. ženski naraštaj — proste vježbe za slet u Sarajevu
7. Starija braća — proste vježbe za slet u Sarajevu
8. Muška djeca — vježbe i kola
9. Članovi — »Hej trubaču«
10. Vježbe na spravama

Iza javne vježbe narodno veselje

Vatromet

Na javnoj vježbi sviraće vojna glazba iz Tuzle i glazba
Vatrogasne čete Jugoslavenske Solvay Tvornice.

Prigodne značke, koje važe za pristup na sve priredbe
prodavaće se po cijeni od Din 10.—, a za javni čas Din 5.—

Za pozorišno veče cijena je sjedišta Din 10.—, Din 6.—
i Din 4.—, a stajanje besplatno sa znakom.

Ministarstvo saobraćaja odobrilo je posjetiocima ove
proslave 50% pópusta na državnim željeznicama.

Dobrovoljni prilozi primaju se sa zahvalnošću.



PROSLAVA
10-GODIŠNJICE
22-24 JUNA